

MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micorì illa rafue
(Mt 3.1-12; Lc 3.1-9, 15-17; Jn 1.19-28)*

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie llumona, Juan Bautista micorì llofuellena llofe. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena llofena, damiena ore-taiticue” Jusiñamui raite.

³ Jofue iñenanomo damie jidai-jidaillana cacadicue. Naimie llofe: “Cai Nama biite. Naimie naiso atona raise fino” llofe.

Naisona llofe; iadedi naimie uaina naimaci feiñollena, naimaci comeciai marena finuana ñaite.

⁴ Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafaifia, naimacimo llofe:

—Omoi jeacinona fañonocaida, Jusiñamui dibesimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uiñotallena, mai omoi bautizallomoi.

⁵ Diga comini naimie micorì dine jai jaisoidimaci. Jerusalémona, nana Judeamona, nana Jordán fue-mona jai jaisoidimaci. Jusiñamuimo naimaci

jeacinona naimaci llua meino, naimacidi Juan micori bautizaga.

⁶ Juan micoridi camello itirai ai ie nilla iniroina jitade. Igoi iena ie moilligaina jitade. Fioduaina rite. Cifona mete. Jamai rana guite. ⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. ⁸ Jusiñamui dibeimo omoi illamona, jinui diga omoi na bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

Jesús bautizaja rafue
(Mt 3.13-17; Lc 3.21-22)

⁹ Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúsdi Juan bautizaga. ¹⁰ Bautizaja mei, jinuimona billanona, ieconi mona bojodena cide. Jusiñamui Joreño, ucugi isoi, naimie emodomo ana billana cide. ¹¹ Monamona Jusiñamui llote:

—Cue isiruiga Jitodio. Ori iobidicue.

Jesúna Taife ramo faia rafue
(Mt 4.1-11; Lc 4.1-13)

¹² Jesús bautizaja mei, Jusiñamui Joreño jofue iñenanomo naimiena uite. ¹³ Comini nainomo iñede. Difai ocainai ai itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisa i naimiena sedadimaci.

Galileamo Jesús illa rafue
(Mt 4.12-17; Lc 4.14-15)

¹⁴ Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. ¹⁵ Llote:

—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai iuaina meido. Bie rafuena mai omoi iino.

Ie llofueoicaigano jaillena, Jesúsdi nagaam-agamiēna fetua rafue

(Mt 4.18-22; Lc 5.1-11)

¹⁶ Jiairuido Galilea railla jorai fuemo Jesús macaritemo, menamiēna ciode. Naga ie ama iaimaiai. Damie Simón. Jiaimie Andrés. Lloijina fairaima iaimaiai. Iese jaca naie iaimaiaidi maijuidiaimaiai. ¹⁷ Iaimaiaimo llote:

—Cue diga omico jaiocaillena, cue diga mai bi. Cue llofueganona omico jaillena jitaidecue. Lliciaina birui ocabitomico; iadedi cominina oitomico, cue dibeimo naimaci illena.

¹⁸ Iena cacajanona, ieconi iaimaiai lloijina fainonocaida, naimie diga jaidiaimaiai. Ie llofueganona jaillena, jaidiaimaiai. ¹⁹ Lliai bai Jesús jaidemo, jiaie menamiēna ciode. Naga ie ama iaimaiai. Damie Jacobo. Jiaimie Juan. Iaimaiai moodi Zebedeo. Botemo iaimaiai lloijina sigaidiaimaiai. ²⁰ Jesús iaimaiaina uaidote, ie llofueganona jaillena. Ie maijiraini diga iaimaiai moonā fainonocaida, botemona ari billanona, Jesús diga jaidiaimaiai.

Jesúdi Janaba anamo itimie jillotaja rafue
(Lc 4.31-37)

²¹ Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofuefe.

²² Moisés micori llogacino llofueraini isoi llofueñede. Illaíma uai isoi naimie llofuia jira, nainomo ite comini naimie llofuiamona rajicaidimaci. ²³ Janaba anamo illamie nainomo ite. ²⁴ Jesús llofuiana cacaita, Janabadi imana ado cuirioitate:

—Odi Nazaret ie Jesús. ¿Bue ñeacadio cai diga? Caina duere finuaibidio. Ona uiñoticue. Odi Jusíñamui ie mare fetocamiedio.

²⁵ Jesús naimiena lletade:

—Llicai. Naimiemona oni jai.

²⁶ Janaba naimiena docaitajanona, ado cuirioillanona, naimiemona oni jaide. ²⁷ Iena ciuanona, nana nainomo itino rajicaidimaci. Coniniri siadotimaci:

—¿Ñiese ite? Bimie jiaie uaido llofuefe. Janabamo naimie llua mei, imamona Janaba oni jaide. Janaba Jesús uaina ñnote.

²⁸ Iemona nana Galilea eniruemo Jesús mameci are soride.

Jesús Pedro jifaiña jillotaja rafue

(Mt 8.14-15; Lc 4.38-39)

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiáide. Jacobo, Juan diga jiai fo jaide. ³⁰ Ie facaise Simón jifaiño duide. Abi cuaride. Nainomo itino Jesús mo naiñaiño duillana llote. ³¹ Iena cacajanona, naiñaiño dine jaillanona, Jesús naiñaiño onollina llinote. Naiñaiña naidacaitade. Ieconi

abi cuarilla fainonocaide. Guille finuanona, ie jofomo itinona ecade.

Jesúdi ailluena duidinona jillotaja rafue
(Mt 8.16-17; Lc 4.40-41)

³² Navuida, jitibicaidemo, Jesús dine comini ail-luena duidinona atidimaci. Janaba anamo itinona jiaí atidimaci. ³³ Nana Capernaum comini naie jofonasemo ofidimaci. ³⁴ Jesúdi diga duicono ailluena duidinona jillotate. Ailluena comini Janaba anamona jillotate. Naimiena jananiái uíñua jira, Jesús naimaci ñaiana rairuide.

Galileamo Jesús llofuia rafue
(Lc 4.42-44)

³⁵ Ie areruido nia monañenia, Jesús casillanona, Capernaumona comini iñenanomo Jesús jaide. Nainomo Jusiñamuimo jide. ³⁶ Monaia, casidemo, jofomo Jesús iñena jira, Simón, ie nabaiñiaí diga, Jesúsna jenuaide. ³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie nairaiaí dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuaí ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue
(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiadedi, cuena jillotaredio.

⁴¹ Naimiëna duenailamona, Jesús ie onolli naimiëmo oni ñuitajanona, naimiëna jetade. Raite:

—Ona jillotaiacadícue. Mai o jillo. ⁴² —Ieconí naimië jillode. ⁴³ Ie facaise Jesús naimiëna oretaiacanano, naimiëmo riire llote:

⁴⁴ —O jilluana bumo lloñeno; iadedí Jerusalémo Jusiñamui jofomo Jusiñamui díga ñairaima díne mai jai. O jilluana comíni raise uiñollena, naimiëmo o abína acatajai. Moisés micorí jaie lloga rana Jusiñamuimo feca.

⁴⁵ Iese Jesús naimiëmo llote; iadedí Jesús finoca rafue llocana eo uite. Ie muidona ailluena comíni Jesúsna cioacana jira, Jesús marefodo comíni illanomo jaisoiñede; ia comíni iñenanomo jaisoide. Iese jaisoide; ia naganomona naimië díne biñoidímací.

2

Jesús tísitaitimíëna jillotaja rafue (Mt 9.1-8; Lc 5.17-26)

¹ Nígarui illanona, Capernaumo Jesús dane abído ride. Comíni iëna fidíanona, ² ie risoillacomo naimië díne ofidímací. Ailluena billa jira, fo illino iñede. Nasemo jiai eo ofidímací. Jesús naimacímo Jusiñamui rafuena llofujete. ³ Comíniina Jesús llofuetemo, naimië díne nagaamagamíe ie bíramo bíde tísitaitimíëna atídímací. ⁴ Ailluena comíni illa jira, Jesús díne naimací rinidímací. Naie jofó bíbanilla jira, jofó emodomo a jaidímací. Jofó beicímo ite tidabacuído a jaidímací. Jofó emodo econuano, Jesús ecímo naimiëna ie bíramo bíde díga, rao díga, ana ñuitadímací.

⁵ Iena Jesús ciuanona, tísitaitimie jilluana naimaci ñnuana Jesús uiñote. Tísitaitimie mo lloste:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶ Nainomo itinomona damierie Moisés micori llogacinona llofueraini nainomo raidimaci. Comecina facadimaci: ⁷ “¿Ñiese bimiedi iese lloste? Dama Jusiñamui jeacinona dotarede. Bimie Jusiñamuñede; ia Jusiñamui ifomo iacade. Jusiñamuina jai jeare ñaite”. ⁸ Naimaci comeciaí facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi?

⁹ Bimie mo: “O jeacinona jai oni dotadicue” cue lloia, cue uai siñonana uiñoñeitomoi; ia bimie mo: “Mai naidacaillanona, o bira ferinocaida, mai macari” cue lloia, cue uai siñonana uiñoitomoi.

¹⁰ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tísitaitimie mo lloiticue: ¹¹ “Mai naidacai. O bira ferianona, o jofomo mai jai”.

¹² Iese naimie raillamona, tísitaitimie jillode. Naidacaida, ie bira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicai.

Jesúdi Levína fetua rafue

(Mt 9.9-13; Lc 5.27-32)

¹³ Jaiaruido jorai fuemo Jesús dane jaide. Ailluena comini naimie dine ofillanona, naimacina llofuate. ¹⁴ Llofuia mei, Jesús bai macaritemo, Leví raillamiena cide. Levídi Alfeo jito. Gobierno ucube ouillanomo naimie maijuide. Nainomo raidena Levína cide. Naimie mo lloste:

—Cue llofuegamiena o jaillena, cue diga bi. —
Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedinó jiai guisaibitimaci. ¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. ¹⁷ Iena cacajano, Jesús llote:

—Ecairedinodi médicona jitañeidimaci; ia duidinodi médicona jitaidimaci. Ie isoide. Mareuidino cuena jitañeidimaci; ia maraiñedinó cuena jitaidimaci. Jusiñamui dibeimo mareuidinona uaibiñedicue; iadedi maraiñedinona uaibiticue. Omoimona maraiñedinó diga nabairiticue; ia naimacina uaibiticue.

*Jesúmo comini guiñenana jicanua rafue
(Mt 9.14-17; Lc 5.33-39)*

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñeidimaci. Naimaci jeacino facaina sunaicabitimaci.

Fariseuai llofueoicaigano iedo jiaí jaidimaci; ia o llofueoicaigano jaca guitimaci. ¿Bue ñellena cai einamaci rafuedo jaiñedimaci?

19-20 Jesús uai ote:

—Jiaíe rafuedo iena lloiticue. Coniruedi ie aina uarui ia, iobilla jira, ie nabaiñiaí sunaiñedimaci. Iobillamona guitimaci. Jiaíruido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

21 Jiaíe rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai marañeno cioite.

22 Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiaí faifite. Como finoca vino comogomo jonelle. Iemei iena faifñeite. Ie isoide. Omoí einamaci rafue ifomo jiaíe rafue birui ite. Iena omoímo llocabiticue. Iedo jaidicai —llote.

*Sábadoruimo Jesús llofueoicaigano maijia rafue
(Mt 12.1-8; Lc 6.1-5)*

23 Jiaíruido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidimaci.

24 Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona

naimaci tjiamaona, caimona jai maijidimaci. Iese cai abimo jeacinona jai finodimaci.

²⁵ Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadu ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. ²⁸ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

3

*Jesúdi onollina idisarodimiena jillotaja rafue
(Mt 12.9-14; Lc 6.6-11)*

¹ Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomoi ite. ² Nainomoi itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Sábadoruimo bu

maijia, naimacimona jeacino finode. ³ Onollina idisarodimemo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuená birui omoi meineiadedi, birui marañede rafue finodomoí. Sábadoruimo, ¿nie isoide rafue finuana rairuidomoí?

Comini dinena uai oñedimaci. ⁵ Naimie uaina naimaci ñnoñena jira, riicaillanona, Jesús naimacimo erodate. Duidimemo llote:

—O onolli mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci. Naimiena meinellena, illaíma Herodes díbeimo itinona baillanona, naimaci díga coniniri siadotimaci.

Jorai fuemo Jesúsdi ailluena cominina llofuia rafue

⁷ Naie nairaimona jorai fuemo Jesús, ie llofueoicaigano díga, oni jaide. Galilea railla eniruemoná ailluena comini naimie dine bitimaci. Judeamoná jaíno bitimaci. ⁸ Jerusalémoná, Idumeamoná, Jordán ruicafabellemoná, Tiro jinofemo ite eniruemoná, Sidón jinofemo ite eniruemoná ailluena bitimaci. Nana naimie siño finoca rafuena cacajanona, naimiena cioacadimaci. ⁹ Comini naimiena meetasii raillanona, ie llofueoicaiganomo daje botemo naimie jaillena eenogana llote. ¹⁰ Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemoná naimie illa bote eenuana jitaide. ¹¹ Jananíaí anamo itino Jesúsna cioia, Jesús

uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio. ¹² —Ia Jesús naimiena naimaci lluana rairuide.

*Jesúdi ie doce llofueoicaiganona fetua rafue
(Mt 10.1-4; Lc 6.12-16)*

¹³ Naie facaise anedumo Jesús jaide. Ie jitaillano diese naimie dine uaidote. Naimie dine billa mei, ¹⁴ doce digamiëna fetode. Naimie diga jaicabillena, naimacina fetode. Ie rafuena lollena, naimacina oretaiacade. ¹⁵ Janaba anamo itinomona Janabana oni oretallena, ie uai naimacimo ite. ¹⁶ Iese mameciredimaci: Simón; naimie mameci jiaicidi Jesús jítaca Pedrona. ¹⁷ Jacobo, Juan; iaímaiaí Zebedeo jito iaímaiaí. Jiaíe mameci iaímaiaína Jesús jonete Boanergesna. Naie mameci oni dobaiñuamona mona guruama. Iciriruilla jira, iese mamecirediaímaiaí. ¹⁸ Andrés, Felipe, Bartolomé, Mateo, Tomás, jiaíe Jacobo; naimiedi Alfeo jito. Tadeo, jiaíe Simón; naimiedi cananista comini facaisemo duide. ¹⁹ Judas Iscariote micori; naimiedi Jesúna gaitatimie.

*Fariseuai Jesúna jeare ñaia rafue
(Mt 12.22-32; Lc 11.14-23; 12.10)*

²⁰ Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. ²¹ Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaíbiacadimaci. ²² Jerusalémona

Moisés micorí llogacínona llofueraíní naie facaise billanona, raitímací:

—Beelzebúdí Janaba comíní. Beelzebú anamo Jesús illamona, Beelzebú uaido Janaba illa comínimona Jesúdí Janabana oni oretate —raitímací.

²³ Naimací raillana naimíe cacajanona, naimíe díne Jesús naimacína uaidote. Llote:

—Janaba díbeimo Beelzebú illamona, dama ie abina oretanide. ²⁴ Ero, daje isoi comeciáina lloíñenamo daje nairáí facañenia, danomo maijínidímací. Oni jaidímací. ²⁵ Daje isoi comeciáina lloíñenamo daje jofomo itino facañenia, danomo jaináíainidímací. Oni jaidímací. ²⁶ Ie isoide. Beelzebú uaido jananiáina omoí llua isoi cue oretáia, Janaba ie díbeimo itino díga jai nabairíñede. Iemona naimíe comíní danomo íñeitímací. Ie uai ieconi saite. ²⁷ Ero, mairidímíe ie jofomo ite rana níbai fííacadomoi. Iena fííllena, naimíena nano raise omoí maíga. Raise maíga meí, ie rana fííredomoi. Ie isoide. Janaba anamona comínina jillotacabítícue. Naimíe afemo nano cue íñenia, comínina jillotanidícue. Naimíe afemo cue illa jira, iena finoredícue. ²⁸ Ie jira bie omoímo lloitícue. Jusiñamui nana comíní jeacínona dotarede. Naimíedi naimací jeare ñaiacínona dotarede; ²⁹ iadedí naimíedi ie Joreñona jeare ñaiacínona jaca dotañeite. Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitímací. Iese naimací

railla jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini

(Mt 12.46-50; Lc 8.19-21)

³¹ Jesús comini naimie dine rillanona, naimie diga ñaiacanano jino naidaidimaci. ³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai. ³⁵ Jusiñamui jitailacinona finodimie cue amana, cue miriñona, cue eina. Imaci ua cue cominina.

4

Jesúdi trigona judaidimiena llua rafue

(Mt 13.1-9; Lc 8.4-8)

¹ Jiairuido jorai fuemo dane jaillanona, ailluena comini naimie dine ofillamona, Jesús naimacina llofuate. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. ² Ailluena rafuena naimacina llofuate. Raite:

³ —Omoi fueollena, bie rafuemo raise cacarei. Damie trigona judaiaide. ⁴ Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

⁶ raise jainañena jira, ecasillamona duide. Ie

jira llisiñede. ⁷ Eecuai illanomo jiaie iduai juide. Eecuai sicuamona riarra eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo treinta diga llisillana ote. Jiaïnamona sesenta diga llisillana ote. Jiaïnamona cien diga llisillana ote. ⁹ Omoi jeforena jira, raise fueollena, cue lluamo cacarei. Iena ñno.

*Jesús ie como lloga rafuena llofua rafue
(Mt 13.10-23; Lc 8.9-15)*

¹⁰ Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiana jicanotimaci. ¹¹ Uai ote:

—Jusiñamuidi omoïna ie sedaacana rafuena jai uiñotade. Jiaie iena uiñotañede. Jiaie cominina iena nia uiñotañede. ¹² Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³ Cue como llofuiacinona omoi raise cacaiñenia, dane cue llofua, iena jiai raise nibai cacaiñeitomoi; ¹⁴ ia iena omoïna llofueiticue. Trigona judaidimiedi Jusiñamui rafue lloraima isoide. ¹⁵ Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaino cacaja uaina ñnotañede. ¹⁶ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. ¹⁷ Nofiemo riga iduai jainaonidedi raise sicoñede.

Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci. ¹⁸ Jiaie iduai eecuai illanomo juide. Naie iduai sicua mei, iena eecuai ibaila jira, raise lisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci; ¹⁹ iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. ²⁰ Jiaie iduai mare enruemo juide. Dajerie comini comeciai naie enrue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi lamparína ñaia rafue
(Lc 8.16-18)*

²¹ Jorai fuedo Jesúdi cominina nia llofujete:

—Jai uneca lamparín jiaie illanomona atia mei, jiaie ra bide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. ²² Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie inotimaci. Damierie inoñedimaci. ²³ Omoi jeforena jira, raise fueollena, cue lluomo cacarei. Iena ino.

²⁴ Cue lluomo raise cacarei. Omoi cacaja diese Jusiñamui omoina uiñotaite. ²⁵ Iena omoi inoia, Jusiñamui omoina canoite. Omoina uiñocana

jaitaite. Jiaimie iena janore cacajamona, iena inoñenia, Jusiñamui naimiena faifitaite.

Jesúdi Jusiñamui ie cominina sedaacana llofuia rafue

²⁶ Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. ²⁷ Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede; ²⁸ ia eniruemonana nano sicode. Monaila mei, lliside. Iemonana naicuai comuide. ²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena inocana jaidomoi.

Jesúdi mostaza ido llua rafue

(Mt 13.31-35; Lc 13.18-19)

³⁰ Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ³¹ Jiaie rafuedo iena omoimo lloiticue. Damie mostaza idona rillamona, naiemona eo aillue riarara sicode. Mostaza ido eo janorede; ³² iadedi sicua mei, eo aillue riarara jaillamona, ie onogaillai jegairiena jira, icairo anamo manaidinomo silliñiai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

³³ Naie isoide rafuiaido Jesúdi Jusiñamui ie cominina sedaacana rafuena cominimo llote.

³⁴ Naimaci cacaja diese llote. Naimacimo jiaie

rafuedo lloñede; ia ie llofueoicaiganomo iena eneno llofujete.

Jesúdi jorai baguana llícaitaja rafue

(Mt 8.23-27; Lc 8.22-25)

³⁵ Ailluena comini llofuia mei, jitoma jai soji-caidemo, ie llofueoicaiganomo Jesús llote:

—Ruica enefebeimo mai cai jailli.

³⁶ Cominina fainonocaida, botemo naimie jai illamona, naimie llua isoi, oni jaidimaci. Jiaie botes jiai jaide.

³⁷⁻³⁸ Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinaillamona, Jesúsna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana llícaitade. Ieconí aifi llícaide. Bagoñede. ⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise inoñedomoi?

⁴¹ Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina inote. Jorai naimie uaina jiai inote. —Bai jaillanona, ruica dine ridimaci.

5

Jesúdi Gadara railla eniruemo illa rafue

(Mt 8.28-34; Lc 8.26-39)

¹ Ruica dine naimaci ridemo, Gadara railla eniruemo sijidimaci. ² Botemona ari Jesús

jaidemo, naimie dine damie bite. Naimiedi Janaba anamo itimie. ³ Comini rai oillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. ⁴ Diga icaiño lleo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide. ⁵ Nagarui nofie motomo ite. Anedumo jaisoide. Cuiri-cuirisoide. Dama ie abina nofici diga jaidode. Iese naimie isoide. ⁶ Nofiemona Jesúna cianona, aisicana Jesús dine bite. Naimiena sedallena, ie caiñici ifodo ana rainadate. ⁷⁻⁸ Jesús llote:

—Janaba, bimiemona oni jai.

Janabadi imana ado llotatate:

—Nanoca Jusiñamui Jitodio. ¿Niese cuena nibaiacadío? Jusiñamui mamecido cuena duere finoño.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúmo duere jicanotimaci. ¹¹ Naie facaise nainomo ite anedumo ailluena chanchuai itimaci. ¹² Chanchuai abimo naimaci jaillena Jesúmo duere jicanotimaci. ¹³ Jesús dinena:

—Jee —raite. Ieconi ima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

14 Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. 15 Jesús dine naimaci ridemo, jaive Janaba anamo illamiēna Jesús ecimo raillana cioidimaci. Naimie iniroina jai jítade. Naimie jai uairicoñede. Iena ciuanona, Jesúsna jaciruitimaci. 16 Naie rafuena cioidino jaive Janaba anamo illamie jilluana llotimaci. Chanchuaimo suide rafuena jiai llotimaci. 17 Naie enirue itinodi Jesúsno naimaci eniruemonā oni jaillena duere jicanotimaci.

18 Botemo Jesús jaiacania, jaive Janaba anamo illamie Jesúsno jicanote, naimie diga jaillena; 19 ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

20 Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

*Jesúdi mena duide riñona jillotaja rafue
(Mt 9.18-26; Lc 8.40-56)*

21 Ruica díbeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fueo naimie nia ia, 22 Jairoña mameciredimiedi Jesús dine bite. Naimiedi judíuai rafue ofiraco sedarima. Jesúsno duere jicanollena, ana bitadate. 23 Duere jicanote:

—Cue jisa jai fioidaiacade. Cue jofomo cue diga bi, o onolli naiñaiño o jonellena, naiñaiño jilloil-lena.

²⁴ Iena cacajano, ie llofueoicaigano diga, naimie diga Jesús jaide. Ailluena comini Jesúmo ñaijillanona jaidimaci. ²⁵ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. ²⁶ Diga manorainimona duere sefuide. Jilloñede; ia fodo jaide. Nana ie ucube jiai fuite. ²⁷ Jesús duidinona jilluana naiñaiño fidiamona, jinafo dinena billanona, naimie iniroina jetade. ²⁸ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²⁹ Ieconi diailladi faionocaide. Ie abi jilluana naiñaiño jai uiñote. ³⁰ Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

³¹ Ie llofueoicaigano dinena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

³² Raise uiñollena, Jesús ie ecimo itinomo erodate. ³³ Duidiñaiño ie jilluana uiñua jira, Jesús dine jaciruicana bite. Naimie uicomo ana bitadajanona, nana naiñaiño o ite rafuena llote.

³⁴ Naiñaiño Jesús llote:

—Ñoo, cuena o inua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jiaino bite. Jairomo llote:

—O jisa jai fioidaite. Maestrona ñaidoñeno.

³⁶ Iena cacajano, Jairomo Jesús llote:

—O comeci jarire iñeno; ia cuena nia ñno.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. ³⁸ Jairo jofomo rillanona, nainomo itino eecuinaillana cacade. Failliñailana cacade. ³⁹ Jesús fo jailla mei, nainomo itinomo jicanote:

—¿Ñiese itomoi eecuinailla? Cuemona naiñaiño fioidañedesa. Jamai inide.

⁴⁰ Iena cacajano, naiñaiño jai fiodaite uiñuamona, Jesúri jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide. ⁴¹ Naiñaiño onollina llinocaida, judíuai uaido raite:

—Talita, cumi. —Iena oni dobaiñuamona: “Jitaibici, mai naidacai” raite.

⁴² Ieconjilluanona naidacaide. Jai jilluano macarite. Naiñaiñomo doce años jai ite. Nana nainomo itino ieri eo rajicaidimaci.

⁴³ —Bumo bie rafuena lloñeno —naimacimo Jesús llote. Guillena naiñaiñona eajana jiai llote.

6

Nazaretmo Jesús illa rafue

(Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano diga Nazaretmo ride. ² Rilla mei, sábadoruimo nainomo ite ofiracomo llofujete. Iena cacajanona, nainomo itino rajicaidimaci. Raitimaci:

—¿Ñiese eo abina uiñote? ¿Bumona ie uaina ote? ¿Ñiese siño rafuena naimiedi finode? Naimiedi

jamai bue isoidimie. ³ Naimiedi amederaima. María jito. Ie amatiaidi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jaimaidimaci.

⁴ Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate; ⁶ ia naimaci ñnoñenari rajicaide. Ie mei diga nairaimo Jesús llofuecana jaide.

*Jesúdi ie llofueoicaiganona oretaja rafue
(Mt 13.53-58; Lc 4.16-30)*

⁷ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Ie rafuena llollena, jiaie illanuaimo naimacina menamierie oretaiacade. ⁸ Raite:

—Ailluena rana uiñeno. Omoi abi riidollena, jiguidana uiño. Llomenicono uiñeno. Ailluena rana omoi uiñellena, bolsana uiñeno. Ucubena uiñeno. ⁹ Zapatona jitajano jai. Abi omoi meidolle ñniroina uiñeno. ¹⁰ Nie nairaimo omoi jai, daacomo omoi ri. Naie nairaimo omoi ille ñnori, daacomo omoi i. ¹¹ Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹² Jesús naimacimo llua mei, jaidimaci.

—Omoï jeacinona fainonocaillanona, Jusiñamui dibeimo omoï comeciai iuai meiduana omoï jai —llofuecana jaidimaci. ¹³ Janaba anamo ite cominimona Janabana oredimaci. Duidino abimo farena gia mei, naimacina jillotate.

*Juan Bautista micori fodailla rafue
(Mt 14.1-12; Lc 9.7-9)*

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Elías jai bairede.

Jiaino raisoidimaci:

—Fodaillamona Jusiñamui facaina jaie lloraïma micori jai jillode.

¹⁶ Jesúsna fidiano, Herodes comecina facade: “Juan micori ie ifogina navui jaitataticue. Fodaillamona naimie jai jillode”.

¹⁷⁻¹⁸ Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías dinena Juan Bautista micorina jearuite. Naimiena meinetaiacade; ²⁰ ia finonide, Juan Bautista micorina Herodes jaciruilla jira. Naimiedi Juan micorina

mareuidimiena uñote. Naimie Juan micori Jusiñamui rafuedo jaillana jiai uñote. Ie muidona naimie Juan micorina raise eenote. Diga icaiño naimie micori llwana cacade. Iena gaide; ia iena raise cacaiñede. Ie muidona Herodías naimie micorina meinetanide; ²¹ ia ja muidomo naiñaiño sedallirui ride. Herodes cumpleaños ie rafuena finode. Ailluena illaicomina ie rafuemo uaidote. Eo ucuberedinona jiai uaidote. ²² Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiño lote:

—O jitailla ra cuemo jica. Iena omo fecaiticue. ²³ Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴ Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dine raire abido billanona, lote:

—Juan Bautista ifogi bandejamo ja jonecaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacañede. ²⁷ Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. ²⁸ Bandejamo naimie ifogi jonecaida, iena atiano, Herodías jisamo fecade. Ieconi ie eimo fecade. ²⁹ Iena fidianona, Juan micori llofueoicaigano naimie micori abina uaibitimaci. Iena raitimaci.

*Jesús cinco mil iñiaina ecaja rafue
(Mt 14.13-21; Lc 9.10-17; Jn 6.1-14)*

³⁰ Jesús llofueoicaigano abido bia, Jesúmo nana naimaci fino ca rafuena llotimaci. ³¹ Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiaabi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo dani jaidimaci. ³³ Ailluena comini naimaci oni jaillana cioidimaci. Naimacina uiñuamona, diga nairaiaimona aisicana jaidimaci. Jesús nia riñenia, uicodo ie jaillanomo ridimaci. ³⁴ Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoí, isoidimaci. Iena uiñuamona, Jesús naimacina duenaite. Ailluena rafuena naimacina llofue. ³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuicade. ³⁶ Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaidio.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciaí diga.

³⁹ Iena cacajano, cominimo raitie illanomo dajerise ana raillena Jesús llote. ⁴⁰ Naimaci cien digamierie ana raisite. Jiaño cincuenta digamierie ana raisite. ⁴¹ Naie cinco llomenicono, naie mena lliciai diga, Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. ⁴² Nana guillanona monidimaci. ⁴³ Monillamona, fiebide guillena iraidimaci. Doce cirigaiaimo oruitatimaci. ⁴⁴ Cinco mil iñiaie diese guitimaci. Naimaci ainiaie, imaci uruiaie diga, jiaie guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. ⁴⁶ Cominina facadua mei, aneduaimo dane jaide, Jusiñamui diga ñaillena. ⁴⁷ Jitibicaidemo, nainomo dama ite. Ie llofueoicaigano jorai motomo jai itimaci. ⁴⁸ Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; ⁴⁹ ia naimiena naimaci ciuanona, comecina facadimaci: “¿Bu joreño caimo billana ciodicaie?” ⁵⁰ Naimiena ciuamona, nana jacinaillamona cuirioidimaci. Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

⁵¹ Botemo Jesús jaide. Ie facaise aifi llucaide. Ieri eo rajicaidimaci. ⁵² Janore guillemona ail-luena cominina naimie eajana jaive ciodimaci;

ia naimie uai siñonana nia raise uiñoñedimaci.
Naimiena nia raise ñnoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci.
⁵⁴ Botemona ari jaidemo, nainomo itino Jesúna uiñotimaci. ⁵⁵ Nana naie eniruemo aisicana jaidimaci, duidino naimie dine atillena. Naimaci baira emododo duidinona atisite. Jesús illana naimaci fidiano, iese atiuidimaci. ⁵⁶ Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

7

Jesúdi comini comeciaina ñaia rafue

(Mt 15.1-20)

¹ Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci. ² Jesús llofueoicaiganomona damierie naimaci isoi guiñenana cidimaci. ³⁻⁵ Fariseuai dinena Jesúmo jicanotimaci:

—¿Bue ñellena omoi llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi, raise jocoñedimaci. Ie jira cai abimo jeacino finodomoí.

Iese jicanotimaci, naimaci einamací rafuedo naimaci jailla jira. Maraiñede rafue naimacimo

suiñellena, iese ailluena judíuai jaidimaci. Naimaci guiacania, naimaci einamaci llua isoi, onollina diga icaiño jocuano, guitimaci. Mercadomona bia, naimaci einamaci llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona marañede. Naimie caina duere finoite”. Jearede rafue naimaci abimo oñellena, iese finouidimaci.

⁶ Jesús uai ote:

—Mareuidinona abi caitauidinodomoí. Isaías micori jaie omoína raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeциаí cue dibeimo raise iñede.

⁷ Cue uai itena, jamai comini llua cinona naimaci llofuecabilla jira, tañona cuena sedadimaci

cuete. ⁸ Isaías micori llua isoi itomoí. Jusiñamui llogacinona fañonocaida, omoí einamaci rafuedo jaidomoí. ⁹ ¿Bue ñellena nana Jusiñamui llogacinodo jaiñedomoí? Omoí einamaci llogacinodo jaidomoí; iadedi nana Jusiñamui llogacinodo raise jaiñedomoí.

¹⁰ Moisés micori jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ¹¹⁻¹² Iese Moisés micori llote; iadedi omoí einamaci llotimaci: “Jusiñamuimo cai

ucubena cai fecajamona, cai moona, cai eina jai canonidicai”. ¹³ Iese omoi finocabilla jira, omoi einamací llogacínodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue lluamo cacarei.

¹⁵ Omoi einamací isoi omoi guiñenia, naimací isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacínona finocabidomoi.

¹⁶ Omoi jeforena jira, raise fueollena, cue lluamo cacarei. Iena ñno.

¹⁷ Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie lluana jicannotimaci. ¹⁸ Uai ote:

—¿Ñiese cue lluana jiai nia cacaiñedomoi? Nie isoide ra guitomoina, omoi comeciaino jeare ñede. ¹⁹ Omoi comeciaino jaiñede; ia omoi jebemo jaide. Ie mei omoi abiaimona jino bite.

Jesús lluamona, nana guille radi mare uiñotícai.

²⁰ Jesús llote:

—Omoi comeciai jearena jira, jearede rafuena finocabidomoi. ²¹ Omoi comeciai jearena jira, jeare comeciaina facacabidomoi. Omoi aiñede riño diga icabitomoi. Omoi iniñede ñima diga icabitomoi. Fñricabitomoi. Cominina meinecabitomoi. ²² Jiai comini rana nicidocabitomoi. Jearede rafuena finocabidomoi. Iena ebiruitomoi. Jifuericabidomoi. Abina

uradoicabidomoi. Jiaie comini joreñaona jeare ñaicabitomoi. Abina iedocabitomoi. Ebona jaicabidomoi. ²³ Bie isoidicinuai omoi comeciaino illa jira, jearede rafuena finocabidomoi; iadedi omoi einamací lua isoi, omoi onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue
(Mt 15.21-28)*

²⁴ Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo jaillanona, iena buna fidiana jítaiñede; ia iena janonide. ²⁵⁻²⁶ Ie facaise judío iñaiñoñediñaiño daño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidianaona, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade. ²⁷ Judíuainedínona naimie canoñenana naiñaiño uiñollena, naiñaiñoño Jesús llote:

—Uruiai guillamona jiconiaina ecadicaidena, maraiñede. Uruiai nano ecadicaí.

²⁸ Naiñaiño dinena uai ote:

—Jii, maestro; iadedi jiconiaidi uruai guillamona fiebide guillemona guitimaci. —Iese llote; ia jiaie rafuemo comecina facade. Uruiaína llote; iadedi judíuaino comecina facade. Jiconiaina llote; ia judíuainedínomo jiai comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa biiramo biidena ciode. Janaba naiñaiñomona oni jaillana jai uiñote.

Jesús jefona cacaiñedimiena jillotaja rafue

³¹ Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiaí jaide. Ja muidomo Galilea railla jorai fuemo ride. ³² Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci. ³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade. ³⁴ Jusiñamui dine monamo eruaita, naimiena duenaillamona, jafaicina faite. Judíuai uaido naimiemo llote:

—¡Efata! —Oni dobaiñuamona: “¡Ecoricai!” raite.

³⁵ Ieconi ie jefodi ecoricaide. Jai raise cacade. Jai raise ñaite. ³⁶ Cominimo:

—Bimie jai jilluana bummo lloñeno —Jesús diga icaiño llote; ia naimie uaina iñoñedimaci. Iena llocana uitimaci. ³⁷ Naimieri eo rajicaidimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

*Jesúdi cuatro mil iñiaina ecaja rafue
(Mt 15.32-39)*

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenaila jira, naimacina canoiacadicue.

⁴ Jicanotimaci:

—¿Niese naimacina bene ecaiticai? Jofue iñenanomo iticai.

⁵ Jesús jicanote:

—¿Niga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci.

⁷ Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote. ⁸ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

⁹ Nainomo cuatro mil iñiaiai guitimaci. Naimaci ainiaiai, imaci uruiaiai diga, jiai guitimaci. ¹⁰ Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

*Fariseuai comini Jesúsno siño rafuena fñuana
jicanuano billa rafuena
(Mt 16.1-4; Lc 12.54-56)*

11 Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

12 Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

13 Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

*Jesús siritate rana llofui rafue
(Mt 16.5-12)*

14 Ruica dine rilla mei, Jesús llofueoicaigano llomeniconna feillana uibiñotimaci. Naimacimo daje llomenico ite. 15 Iena naimie uiñuamona, naimacimo Jesús llote:

—Fariseuai siritate ramona abina rairui. Illaima Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

16 Jesús iese llua jira, iena naimaci raise cacaiñena jira, daní coniniri siadotimaci:

—Llomeniconna cai atiñena jira, caimo iese llote.

17 Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena iñoñedomoi? Cueno siño uai illana nia raise cacaiñedomoi. 18 Uisiredomoi. Jeforedomoi. ¿Ñiese

cue navui siño finoca rafuemo comeciaina fa-
cañedomoi? ¹⁹ Navui cinco mil iñiaí cinco diga
llomeniconá guitimaci. Monillamona, guigamona
fiebillamona, ¿niga cirigaiaimo iraidomoi?

Uai otimaci:

—Doce.

²⁰ Jesús llote:

—Jiaicaiño cuatro mil iñiaí siete diga
llomeniconá guitimaci. Monillamona, guigamona
fiebillamona, ¿niga cirigaiaimo iraidomoi?

Uai otimaci:

—Siete.

²¹ Jesús dinena jicanote:

—¿Niese cuena nia raise iñoñedomoi? Siño uai
cuemo illana nia raise iñoñedomoi.

Jesús uisnidimiena jillotaja rafue

²² Oni macarillanona, Betsaidamo Jesús, ie llo-
fueoicaigano diga, ride. Ie facaise naimie dine
comini uisnidimiena atide. Naimiena jilloital-
lena, naimiena jetallena, Jesúmo jicanote. ²³ Iena
Jesús cacajanona, ie onollina llinuanona, nairai
illa jinofemo uisnidimiena uite. Ie mei ie uisina
tuade. Ie uisina jiaí jetade. Naimiemo jicanote:

—¿Buena ciodio?

²⁴ A eruaillanona, uai ote:

—Comini macarillana ciodicue; ia amena isoi
eruaidimaci. Nia raise cionidicue.

²⁵ Ie uisina Jesús dane jetade. Iemona oni ero-
caillamona, jai jillode. Jai raise ciodé. ²⁶ Jai jillua
jira, ie jofomo naimiena abido orede. Jesús llote:

—Betsaidamo itino o jilluana lloñeno; ia nain-
omo jaiñeno o jofomo mai abido jai.

Pedro Jesúsna llua rafue
(Mt 16.13-20; Lc 9.18-21)

²⁷ Cesarea Filipo eniruemote ite nairaiaimo Jesús jaidemo, ie llofueoicaiganomo jicantote:

—¿Ñiese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eliadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁹ Jesús dane jicantote:

—¿Ñiese omoi cuena raitomoi?

Pedro uai ote:

—Odi cai jilloitaraimadio. Jusiñamui facaina lloraini micoriai o billena jaie llotimaci

³⁰ Jesús iena bumo llua rairuide.

Jesús ie fiodaillena llofuia rafue
(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofue. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamonajilloiticue.

³² Iena marenfodo naimacimo llote. Iena caca-jano, Pedro dinena lletade:

—Dama ite. Iese lloño. Bie isoide rafuena lloño.

³³ Ie llofueoicaiganomo erodajanona, Jesús Pedromo riire llote:

—Cuemonona oni jai. Iese ñaiño, Taife isoi o comequina o facaja jira. Jusiñamui isoi cuemo comequina facañedio. Comini isoi cuemo comequina facadio.

34 Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite. 35-37 Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jaija, jaca faifiñeite. Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite. 38 Birui ite comini Jusiñamuina jitañedimaci. Naimiena jai fañonocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruticue. Cuena meiruillamona: “Cristomoduidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisaí diga, cue Moo dinena, monamona ico biiticue. Cue Moo uai cuemo illanona, ebire biiticue.

9

1 'Omoimo uanaicinona lloticue. Omoimona dajerie nia fiodañeitomoimo, illaimana ebire cue bairellena cioitomoí.

Jesús abí meidocaila rafue
(Mt 17.1-13; Lc 9.28-36)

2 Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uiñede. Nainomo rilla mei, naimaci uicomo naimie abí meidocaide.

³ Naie daciaño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. ⁴ Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaimaia. ⁵ Iaimaia jaiacania, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oie, jaie Moisés micori ie, jaie Elías ie.

⁶ Eo jaciruilla jira, naimie ñaia rafuena raise uñoñoeno jamai ebena ñaite. ⁷ Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie llamo cacareillanona, iena ino —llote.

⁸ Ieconí oni erodajanona, dama Jesúna cidimaci. Jiaínona cioiñedimaci.

⁹ Anedumona bitimacimo, naimacimo Jesús llote:

—Omoi ailli cúa rafuena bummo lloñoeno, cue fiodaillamona cue jillua dinori. ¹⁰ Jesús llua isoi finodimaci. Iena bummo lloñedimaci; ia fiodaillamona naimie jilluana naimaci raise nia cacaiñaena jira, iemo comecina facadimaci. ¹¹ Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamui mona o billana inoticaí. Odi cai Jilloitaraimana inoticaí. Odi cai Jilloitaraimadíomo, ¿bue ñelli iese raitimaci?

¹² Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lllollena. Jusiñamui ñibeimo naimaci illena, comini imaci comeciai meiduana llote. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca. ¹³ Elías isoidimie jai bite; iadedi Jusiñamui facaina lloraima micori jaie cueda isoi, naimaci jitailla jira, naimiena jai meinetimaci.

*Jesúdi Janaba anamo itimiena jillotaja rafue
(Mt 17.14-21; Lc 9.37-43)*

¹⁴ Ie jiaie llofueoicaigano ñine Jesús abido ñia, nainomo ailluena comini itimacimo ñide. Moisés micori llogacinona llofueraini ñinena ie llofueoicaigano uaina uaitaside. ¹⁵ Jesús billana comini ciuanona, jacinaisidimaci. Naimiena feñollena, naimie ñine aisida jaidimaci. ¹⁶ Moisés micori llogacinona llofuerainimo Jesús jicanote:

—¿Ñiese cue llofueoicaigano uaina uaitatomo?

¹⁷ Uai ñenedimaci; ia cominimona ñaimie uai ote:

—Maestro, Janaba anamo cue jito illa jira, o ñine naimiena atidicue. Cue jito Janaba anamo illamona ñainide. ¹⁸ Nagarui Janaba bille ñiese, naimiena enruemo uaitate. Iemona fueði mullede. Ie isidodi murude. Ie abi jaiare jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraini bie rafuena, o llofueoicaigano ñiga, uaina uaitatimaci.

¹⁹ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Omoi diga are iticue. Raise omoi ñnollena, ¿nie ñnori omoi diga iiticue?

Naie duidimie moomo llote:

—O jito cue ñine mai ati.

²⁰ Naie urue Jesús ñine atianona, Janaba naimiena naillitate. Iemona urue eniruemo uaide. Jabi-jabide. Fue mullede. ²¹ Jesús ñinena naie urue moomo jicanote:

—¿Ñie ñnori o jitodi bie isoi ite?

Uai ote:

—Naimie uruenamona. ²² Janabadi, diga icaiño iraimo usillena, naimiena uaitate. Corobaillena, diga icaiño jñuimo jiai uaitate. Janaba oni o oretarenia, cocona duenaillamona, cocona cano.

²³ Jesús uai ote:

—“O oretarenia” raitio. Ero, o jito jillotaredicue. Cuen a o ñnoia, o jito jilloite.

²⁴ Naie urue moo ieconi llote:

—Ona ñnoticue. Raise nia cue ñnoñenia, cuena raise ñnota.

²⁵ Naie facaise ailluena comini naimie ñine raire ofillana naimie cñanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie ñine dane biñeno.

²⁶ Ado cuirioillanona, naimiena eo riire naillitajanona, Janaba oni jaide. Iemona naie urue fiodaitimie isoi eroaide. Naimiena cñanona, nainomo itino raitimaci:

—Naimie jai fiodaite; ²⁷ —ia Jesús naimie onollina llinocaida, naimiena a naidanete.

²⁸ Iemona oni jaillanona, ñaimie jofomo Jesús nailli ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

²⁹ Jesús uai ote:

—Jusiñamuimo omoi jiamona, naimiena raise omoi inuamona, bie isoide Janabana oretare-domoi. Naimiena omoi raise inoñena jira, bie uruemona Janabana oni oretañedomoi.

*Jesús ie fiodaillena dane llofuia rafue
(Mt 17.22-23; Lc 9.43-45)*

³⁰⁻³¹ Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

³² Ie llofueoicaigano iena raise cacaiñedimaci; ia naimiemo iena jicanuana meiruitimaci.

*Jesús ie llofueoicaigano moto imiëna ille rafue
(Mt 18.1-5; Lc 9.46-48)*

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴ Uai oñedimaci. Naimaci moto imiëna illena, naisodo siadocana bitimaci. Meiruillanona, uai oñedimaci.

³⁵ Naimie ana rainadaja mei, ie ecimo naimacina uaidote. Raite:

—Omoï moto imiëna bu iacania, jamai bue isoidimiëna naimie illa. Omoï muillaimana naimie jailla isoilla.

³⁶ Iena naimaci raise uiñollena, nainomo ite cominimona daje urue bai jainanocaida, naimaci motomo naimiëna jonete. Naimiëna menioita, naimacimo llote:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiëna feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

Jesúdi ie dibeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimienaa ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiëna rairuiñeno. Cue mamecido siño rafuena bu finoia, cuena jeare raire ñaiñeite.

⁴⁰ Cai dibeimo itimiedi cai facaisena ite. ⁴¹ Ero, cuemo omoï duillamona, omoïna bu janore canoia, Jusiñamuimona ibana feiñoite. Omoïmo nibai jamai jinuina fecaite; iadedi omoïna naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofuia rafue

(Mt 18.6-9; Lc 17.1-2)

⁴² Jesús nia llofuate:

—Cuena como inotinona jeacinona finotaiacadimie iena finoñellena, naimie cimaimo

aillue nofici maianona, joraimo corobaillena naimiena dotacadena, mare. ⁴³⁻⁴⁸ Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoñeno. Naimacimo ite aiai fioidañena jira, naie irai jaca duiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue cominina jai jaidinona uiñoiticue. ⁵⁰ Guille caimaretallena, sal mare; iadedi ie caimano jai iñenia, iena dane caimaretañedica. Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

*Jesús iima ie aina dotaja rafuena llofuia rafue
(Mt 19.1-12; Lc 16.18)*

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica dibeimo jaide. Ailluena comini naimie dine ofillamona, naimie llofueuilla isoi, naimacina llofujete. ² Naimiena

facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Niese Moisés micori lloste?

⁴ Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñaona dotaite”.

⁵ Jesús uai ote:

—Jusiñamui uaina raise omoi ñinoñena jira, Moisés micori iima ie aina dotajana rairuiñede; ⁶ iadedi nano dofoconi iese iñede. Enirue finua facaiseconi Jusiñamuidi come iaímaiaína finode. Iimana finode. Riñona jiai finode. ⁷ Ie jira Jusiñamuidi jaie lloste: “Ie ai diga illena, iima ie moona fañonocaite. Ie eina jiai fañonocaite. Ie ai diga illamona, menade comedi daamienna jai jaide” lloste. ⁸ Menade come jai daamienna jai ite. ⁹ Jusiñamui iese iaímaiaína itataja jira, iima ie aina dotajana rairuidicue. Riño ie inina dotajana rairuidicue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci.

¹¹ Jesús dinena lloste:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. ¹² Ie inina fañonocaillanona, jiaimienna nie riño uamona, naiñaiño jeacino jai finode.

*Jesúdi naimie dine uruiaí billana jitailla rafue
(Mt 19.13-15; Lc 18.15-17)*

13 Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaidimaci. “Naimacina raise cano” ie Momo lollena jitaidimaci. Ie llofueoicaigano iena rairuidimaci; 14 iadedi iena cajano, Jesús icirite. Jesús raite:

—Uruiai cue dine billesa. Naimacina rairuiñeno. Cuen a bie isoi inotinodi Jusiñamui cominidimaci. 15 Bie uruai abina iedoñedimaci. Einamacimona jamai bue isoidimaci. Naimaci isoi bu inenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

16 Naie uruai dasarie meni-menioicaida, naimaci ifogimo ie onollina joneta:

—Jusiñamui omoina canoite —llote.

*Ucuberedimie Jesús diga ñaia rafue
(Mt 19.16-30; Lc 18.18-30)*

17 Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

18 Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. 19 Moisés micori llogacinuaina inocana jai. Jai e cuete: “Comena meineño. O aiñede riño diga ineno. Fiiño. Jaiimiena o llogidoia, tainona lloño. O moo uaina ino. O ei uaina ino”.

20 Uai ote:

—Maestro, uruena cue illa facaisemona nana bie llogacinuaina inoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cueno o #nuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide. ²³ Naimie jailla mei, ie llofueoicaiganomo eruaillanona, naimacimo llote:

—Ucuberedinodi Jusiñamui cominina jaillena eo sefuiruimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁶ Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodicai. Nana cai rana fañonocaida, o diga jai jaicabidicai.

29 Jesús uai ote:

—Janaicino lloiticue. Cuená naimie isiruillamona, cue rafuena naimie llumona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, 30 Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuai, ie eitíai, ie uruíai, ie enírue birui iite. Monamo naimie íco caimare iocire jaca iite. 31 Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoiñedimaci; ia Jusiñamuimona íco jamai bue isoitimaci Jiainomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona íco jamai bue isoiñeitimaci.

*Jesús ie fiodaillena dane llua rafue
(Mt 20.17-19; Lc 18.31-34)*

32 Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano rajicaidimaci. Naimaci díga jaidino jaciruoicaida jaidimaci. Naimacina jiaí meiniana jaciruitimaci. Ie llofueoicaigano díga ñaianona, naimiemo sülle rafuena llote:

33 —Ero, Jerusalémo jai jaidícai. Monamona billanona, imana jaidícue; iadedí omoí illaícominí cuena gaitaitimaci. Gaitaja mei, cue meinellena lloítimaci. Judíuaiñedino illaícominimo cuena fecaitimaci. 34 Cueri jifanoítimaci. Cuená tullaítimaci. Cuená faitimaci. Cuená meineítimaci;

iadedi cue fiodailla mei, darui amani illanona, jilloitice —lote.

Jesús dine Jacobo Juan iaimaia billa rafue

(Mt 20.20-28)

³⁵ Naie facaise Jesús dine Jacobo, Juan diga bitiaimaia. Iaimaia moodi Zebedeo. Raitiaimaia:

—Omo coco jicalle rafue cocoenafinuana jitaidicoco.

³⁶ Jesús uai ote:

—¿Nie isoide rafuena jitaidomico?

³⁷ Uai otiaimaia:

—Illaimana o jailla mei, o ecimo coco illena o lluanajitaidicoco. Dame o nabeimo. Jiaimie o jarifebeimo. —Jiaino afemo iaimaia illena, iese llotiaimaia.

³⁸ Jesús dinena lote:

—Omico jicanuana raise uifoneomico. Cue eoduere sefuitice. Llegi cacaitice. ¿Ie isoi duere sefuiacadomico? ¿Ie isoi llegi cacaiacadomico?

³⁹ Uai otiaimaia:

—Jii. Sefuiacadicoco.

Jesús dinena raite:

—Cue isoi duere sefuitomico. Llegi cacaitomico;
⁴⁰ iadedi cue nabeimo omico illena, cue jarifebeimo omico illena itatanidice. Naie illano jai cue Moo finoca, nainomo iitino iena.

⁴¹ Iena jiaie llofueoicaigano cacajano, naie iaiaiairi iciritimaci. ⁴² Jesús nana naimacina uaiduanona, raite:

—Nana illaicomididi naimaci anamo itinona ocuicabidimaci; ⁴³ iadedi omoi dine iese ifena. Omoimona bu imiena iacania, omoi mullaimana naimie jaisoillasa. ⁴⁴ Omoimona bu imiena

iacania, omoina naimie canocana jaisoillasa.
⁴⁵ Cuemona fueo. Biñedicue, cominina cue
 ocuillena; iadedi cominina canuaibidicue. Cue
 jitailla jira, nana comini facaina fiodaisaibiticue.
 Naimaci jeacinomona naimaci jillobillena,
 fiodaisaibiticue. Ailluena comini cuena
 inuamona, jilloitimaci. Coninina omoi canua
 —llote.

Jesúdi Bartimeona jillotaja rafue
(Mt 20.29-34; Lc 18.35-43)

⁴⁶ Oni jaillanona, Jericó railla nairaimo Jesús
 ride. Naiemona ie llofueoicaigano diga jaillanona,
 ailluena comini Jesús jinafona racadimaci. Naie
 facaise nai fuemo uisnidimie raide. Naimie
 mameci Bartimeo. Timeo jito. Nainomo jamai
 raide, ucubena jamai jica-jicallena. ⁴⁷ Nazaret ie
 Jesús jaillana naimie cacajano, ado cuirioide:

—David micori Jitona o illamona,
 Jusiñamuimona o billa jira, cuena duenai. Cuena
 cano.

⁴⁸ Naimie llicaillena, Jesús diga jaidino
 naimiena lletade; iadedi eo cuirioide:

—Maestro, David micori Jitona o illamona,
 cuena duenai.

⁴⁹ Naimiena cacajano, Jesús naidadajanona,
 llote:

—Naimiena cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona
 uaidote.

⁵⁰ Iena cacajano, ie emodomo itiroina
 duiñuanona, raire naidacaida, Jesús dine bite.

⁵¹ Naimiemo Jesús jicanote:

—¿Niese ona cue nibaiana jitaidio?

Uai ote:

—Maestro, cioacadicue.

⁵² Jesús dinena uai ote:

—Cuena o ñnua jira, jai jillodio. Mai jai. —Ieconí naimie jai ciode. Jesús diga jaidino diga naimie jiai jaide.

11

Jesús illaima isoi Jerusalémo jailla rafue

(Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iaireicaidimacimo, Betfagé railla nairaimo ie llofueoicaigano diga Jesús ride. Betania nainomo jiai ite. Olivos railla anedumo naga nairai iaimaiai ite. Ie llofueoicaiganomona Jesús menamiena orede.

² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³ Omicomo: “¿Bue ñellena iena suiñodomico?” bu jicanoia, lono: “Coco Nama iena jitaide. Nailli iena raire abido oretaite llote”.

⁴ Naimie llua isoi, jaidiaimaiai. Naisomo jofo nasemo burritona baillanona, iena suiñodiaimaiai. ⁵ Ie facaise nainomo itino jicanote:

—¿Bue ñellena burritona suiñodomico?

⁶ Jesús llua isoi uai otiaimaiai. Ie muidona:

—Jee —raitimaci.

⁷ Burritona atidiaimaiai. Ie emodomo naimie llofueoicaigano naimaci ñiroi jobianona, ie emodomo Jesús rainadate. ⁸ Naimiena iobitallena, illaima isoi naimie jaillena, diga comini, imaci

inironi diga, naiso motomo jobedimaci. Jiaino nai fuemona raforona uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraïma billa! Jusiñamui mamecido bitimie eo mare. ¹⁰ Cai illaïma David micori ifomo caïna sedallena, damie billemo birui ocuiridicai. Jusiñamui caïna jilloitajasa.

¹¹ Iese Jerusalémo naimie jaide. Nainomo ril-lanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

*Jesús higuera railla riarana faidua rafue
(Mt 21.18-19)*

¹² Ie areruido Betaniamona Jerusalémo abido ie llofueoicaigano diga Jesús bia, aimetaite. ¹³ Arena higuera railla riarana ciuanona, iena jibuide. Como firuide; ia naie llisilladi ñede. Ie llisilla facaise nia ñede. ¹⁴ Ie jira naie riarana llote:

—Biemona jaca llisiñeite. —Ie llofueoicaigano naimie llwana cacadimaci.

*Jesúdi Jusiñamui jofomona damieriena dotaja rafue
(Mt 21.12-17; Lc 19.45-48; Jn 2.13-22)*

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaïaïna fecallena, naimiemo toïca llaudaïaïna fecallena, nainomo comini jaisoidimaci. Naie cominina ibatajanona, ofomaïaïna, toïca llaudaïaïa diga, damierie fecauidimaci. Iena Jesús ciuanona, naimaci mesaïaïna oni caicode. Ucugina fecauidino

rairacuai jiaí oni caicode. ¹⁶ Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. ¹⁷ Naimacina llofueite:

—Ie facaina lloraima micori Jusiñamui llogacino jaie cuega: “Cue jofo ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinellena, coninri siadotimaci. Ailluena comini naimie llofuiana ebiruillanona, rajicaidimaci. Ie jira judíuai illaicomini naimiena jaciruillamona, naimienania meinenidimaci. ¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riana duilla rafue

(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riana duillana ciodimaci. Nana ie jainao diga duillana ciodimaci.

²¹ Jesús navui are lluaña Pedro uibiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina ñnocana jai. ²³ Uanaicinona omoimo lloiticue. Jusiñamui lluaña raise bu ñnoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. ²⁴ Nie isoide rafue Jusiñamuimo omoi jicajia, naimie iena finuana omoi ñnuamona, iena naimie finoite. ²⁵ Jusiñamuimo o jiacania, jiamie diga o rafue ia iena feita. Ie isoí cai Moo Jusiñamui omoimo ite

jeacino jiaí feitaite; ²⁶ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micorí llogacino llofueraíni. Naimacidi einamací. Díese billanona, ²⁸ jicanotimaci:

—¿Nie isoide uaido o finoca rafuena finodio? ¿Bu omo íga uai diga o finoca rafuena finodio?

²⁹ Jesús dinena uai ote:

—Omoímo daje rafuena nano jicanoitícue. Raise omoi fairioia, omoímo cue uaido cue finoca rafuena lloitícue. ³⁰ Juan Bautista micorídi cominina navui bautizade. ¿Bu naimie micorína orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caímo jicanoite: “¿Bue ñellena naimie micorí llwana ññoñedomoi?”

³² “Comini” cai fairioia, bene itino caína níbaí meineitimaci, Juan micorídi Jusiñamui facaina lloraíma naimaci railla jira.

³³ Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoímo lloñeítícue.

12

*Jesúdi maraiñede maijiraini rafuena llua rafue
(Mt 21.33-46; Lc 20.9-19)*

¹ Judíuai illaicomínimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiaruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaínomo fecade. Ie mei jiaie eniruemo jaide. ² Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riará llisilla ollena; ³ iadedi naie sedarainidi ie mullaimana fatimaci. Ie mei naimiemo riará fecañeno naimiena abido oredimaci. ⁴ Ie mei patrón jiaie mullaimana orede. Naimie ifogina bofedimaci. Naimiena jeare finodimaci. ⁵ Ie mei patrón jiaimiena orede. Naimiena meinetimaci. Ie mei ailluena mullaiaína orede. Damieriena fatimaci. Damieriena meinetimaci. ⁶ Patrómo ie isiruiga jito ite. “Cue jitona jaciruitimaci. Naimie uaina inoitimaci. Naimiena oretaiticue” patrón comecina facade. ⁷ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ⁸ Naimaci dine naimie rilla mei, naimiena meinetimaci. Ie mei ie abina illimona jino dotadimaci. ⁹ Iena fidia mei, ¿ñiese naie patrón nibaite? Ero, naimie billanona, ie illina sedarainina fuidoite. Ie mei jiaínona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoina jaie cuete. Ie cuega-fuena raise facañedomoi. Naimie micori cuega: Jofo finoraini jitaiñena nofici di nana naie jofomo ite nofici baifemo jai uaide.

Jusiñamui iena finotate.

Iena cai uifnuamona: “Eo mare” raiticai cuega. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

¹² Judíuái illaicomini iena cacajanona, Jesús naimacina ñaiana naimaci uifnuamona, naimiena gaitacadimaci; ia cominina jaciruitimaci. Ie jira naimiemona oni jaidimaci.

Jesúmo gobiernomo ucubena fecajana jicaua rafue

(Mt 22.15-22; Lc 20.20-26)

¹³ Judíuái illaicomini jailla mei, dajerie fariseuai cominina Jesús dine oredimaci. Illaima Herodes dibeimo itinona oredimaci. Naimie raise uai oñenia, naimiena duere finollena, Jesúsna facaciacadimaci. ¹⁴⁻¹⁵ Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí;

iadedi romanuai railla nairai anamo birui cai illa jira, ¿naimaci illaïma Césarmo ucubena cai fecajana rairuidio? Caimo llono —lloṭimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoï? Ucube cuemo acata.

¹⁶ Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiide bie cuega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie llwana cacajano, naimie raise uai ua jira, ieri rajicaidimaci. Naimie iese llua jira, naimiena duere finonidimaci.

*Jesús dine saduceuai railla comini billa rafue
(Mt 22.23-33; Lc 20.27-40)*

¹⁸ Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo lloṭimaci:

¹⁹ —Maestro, cai facaina Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁰ Bie rafuena uiñoiacadicaï. Siete amatiaï ite. Nano doforamie ie aina ote. Naimie nia uruiainide fiodailla. ²¹ Ie emodo imie ie ama feciñona ote. Naimie uruiainide jiaï fiodailla. Naie siete digamiedemona iese sefuide. ²² Uruiainide nana fiodailla. Ja muidomo naie riño jiaï fiodaite.

²³ Fiodaillamona, ico naimaci jilloiadedi, ¿bu naie

riño ienite? Naiñaiño siete digamiēna inirede — llotimaci.

²⁴ Jesús uai ote:

—Moisés micori ciegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

²⁵ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai anidimaci. Ininidimaci. Ie isoi naie siete amatiaī itimaci. ²⁶ Fiodaitino ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ²⁷ Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaina jai jillotaite. Fiodaillamona jilluana omoi raise uiñoñedomoi —llote.

Jesús nanoca llogacinona llofui rafue

(Mt 22.34-40)

²⁸ Naie facaise Moisés micori llogacinona llofueraima Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúsmo jicanote:

—Moisés micori jaie llogacinuaimona, ¿nie llogacino ua nanoca llogacinona?

²⁹ Jesús dinena uai ote:

—Moisés micori jaie cuela: “Israel comini, bie rafuemo cacarei. Cai Nama Jusiñamui jaca da-jede. ³⁰ Omoi jitailla jira, nana omoi comeciāi

diga, cai Nama Jusiñamuina isirui. Naimiemo omoi comeciaina eo faca”. ³¹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

³² Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede. ³³ Cai jitailla jira, nana cai comeciai diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadica. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o ñinocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

*Jesús dinena fariseuai cominimo jicanua rafue
(Mt 22.41-46; Lc 20.41-44)*

³⁵ Jusiñamui jofomo Jesús jailla mei, nainomo itinomo jicanote:

—¿Ñiese Moisés micori llogacinona llofueraini Cristona raitimaci? ¿Ñiese naimiedi David micori jitona raitimaci? ³⁶ Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote: “Illaimana o illamona, cue nabei dine ana rai.

Ona ñinoñedino o anamo itataiticue”.

³⁷ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede;

ia jiaie Nama. —Nainomo itino naimie llofuiana iocire cacareidimaci.

*Jesúdi judúuai illaicomínina ñaia rafue
(Mt 23.1-36; Lc 11.37-54; 20.45-47)*

³⁸ Jusiñamui jofomo Jesús nia llofuianona, raite:

—Moisés micori llogacinona llofueraínimona abina rairui. Illaicomínina naimaci itimacidená, naimacina comini cioillena, eo mare iniroina jitaacacabidimaci. Níne naimaci macaria, naimaci jamai bue isoiñedinona itimacidená, comini naimacina uaiduana gaidimaci. ³⁹ Comini naimacimo acarillena, ofiracomo uicomo raiacadimaci. Rafue ia: “Jamai bue isoiñedicaí” raillamo comequina facajanona, rafue nama ecimo raiacadimaci. ⁴⁰ Feciñuaimona rana ocabillanona, naiñaiñuaina duere finodimaci. Naimiena eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

*Jesúdi Jusiñamui jofomo duerede feciño ucube fecajana ciua rafue
(Lc 21.1-4)*

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. ⁴² Ie facaise eo duerede feciño menaruñu jonete. ⁴³ Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete. ⁴⁴ Naimacimo ailluena ite ucubemona janore fecadimaci. Naiñaiño eo duerede;

iadedi nana naiñaiñomo ite ucubena jonete. Ie jira jiaino baifemo jonete.

13

Jesúdi Jerusalémo ite Jusiñamui jofo judaiana llua rafue

(Mt 24.1-2; Lc 21.5-6)

¹ Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiái co ebirede. Bico eo ebire ciode.

² Jesús dinena uai ote:

—Bie jofo birui eo mare; ia nana bie jofomo ite noficiái ico judaisite —llote.

³ Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoína bie rafuena bu jifueñellena, omoí abina rairui. ⁶ Ailluena comini cue mamecido billemona: “Cristodícue” raitimaci. Diga comina jifueitimaci. Iemona omoí abina rairui. ⁷ Jobaimiaí illena fidítomoi; iadedi jaciruiño. Iese suite; iadedi abido nia biñeítícue. ⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai

suite. Diga illanuaimo comini aime guitimaci. Iese
 suia, omoi duere sefuillifue omoimo suite. ⁹ Abina
 rairui. Dajerie omoina llogidoitimaci. Omoina
 gaitaja mei, naimaci ofiracomo omoina faitimaci.
 Cuemo omoi duilla jira, omoina gaitajanona,
 omoina duere finollena, illaicomini dine omoina
 uitimaci; ia naimacimo cue rafuena lloito moi.
¹⁰ Diga comini cue rafuena nana nairaimo
 lloitimaci, nana nairaiiai iena cacaillena. Ie mei
 abido biiticue. ¹¹ Naie illaicomini dine omoi ia,
 juez dine omoi ia, omoi abi riidollicinomo omoi
 comeciaina jarire facaño. Naie facaise omoi
 ñaillicinona uiñoitomo. Dani omoi comeci
 icinodo ñaiñoitomo; ia Jusiñamui Joreño uaido
 ñaitomo. ¹² Cuen a ñnotomo; ia ailluena
 cuena ñnoñeitimaci. Cuen omoi ñnua jira,
 omoina enoitimaci. Iemona dajerie ie amana
 meinetallena, naimiena llogidoite. Dajerie moodi
 ie uruena meinetallena, naimiena llogidoite.
 Dajerie uruiaidi naimaci moona, naimaci eina
 meinetallena, naimacina llogidoitimaci. ¹³ Cue
 cominina omoi illamona, nana nairai omoina
 enoitimaci; iadedi cuena fainonocaiñedimie
 ja muidomo monamo jaca iite. Naimiena
 jillotaiticue. ¹⁴ Cue lluomo cacarei. Jusiñamui
 facaina lloramadi jiaimie jearede rafue finollena
 jaie lloite. Naie rafue suia, Jusiñamui jofomo
 Jusiñamuina sedañoitomo. Nainomo ite jearede
 rafue finuana omoi ciuanona, naiemona omoi
 jillobillena, duere omoi sefuiñellena, Judeamo
 omoi illamona, aneduai dine omoi aisi. ¹⁵ Jof
 emodomo omoi ia, ana billanona, aneduai
 dine raire rillena, jofomo jaiño. Nainomo ite

rana omoï diga uñeno. ¹⁶ Aneuai dine raire rillena, illimo omoï ia, abido jofomo biñeno, omoï iniroi omoï diga uillena. ¹⁷ Naie rafuemonajillobillena, naie facaise urueside riño duere sefuite. Uruena nia jirode riñodi jiai duere sefuite. ¹⁸ Eo duere sefuiñellena, Jusiñamui omoï jicano, rollime facaiseconi bie rafue suiñellena. ¹⁹ Naie facaise comini eo duere sefuitimaci. Jusiñamuidi enirue finua facaisemonajiese comini nia duere sefuiñeditimaci. Ico iese eo duere sefuiñeitimaci. ²⁰ Naie facaise ianori fo Jusiñamui oñitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ 'Ie facaise omoïmo bu raia: “Jai, Jusiñamui facaina lloraima benomo birui bairede. Naimiedi Cristo”, iena ñnoño, Jiaimie raia: “Oni batine Cristo birui bairede”, iena ñnoño. ²² Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³ Ie jira omoï abina rairui. Ero, bie rafue nia suiñenia, iena omoïmo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

²⁴ Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. ²⁵ Monamona ucuaï ana llujite. Nana naie radi jaidisite. ²⁶ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁷ Cue jaienisaina cue ecimona oretaiticue. Cue fetocano diese naganomona ofitaitimaci.

28 'Higuera railla riaramona omoï fueo. Bie eniruemo naie riara firuillamona, fiemona raire illana uiñotomoï. 29 Ie isoide. Bie rafue ico suia, cue billirui iaïrei illena uiñoitomoï. 30 Uanaicinona omoïmo lloiticue. Nana bie rafue suille facaiseconi bie nairai nia iite. 31 Mona enirue diga fuite; iadedi cue lloga uai jaca suite. 32 Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. 33 Abina rairuicana jai. Naimie omoïna canollena, Jusiñamuimo jiai jicabi. Cue billirui omoï uiñoñena jira, iemo ocuiri.

34 'Iena omoï raise uiñollena, bie rafuena lloiticue. Patrón jiaie eniruemo jaide. Nia jaiñenia, ie mullaiaina ie jofona sedatate. Nagamie ie maijille ocuide. Jofo nasena sedadimie mo naimie billemo raise ocuirillena llote. 35 Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. 36 Ebena naimie biite. Inidimacimo naimaci baisabi raillanona, naimaci jaca ocuirilla. 37 Ie isoide. Ebena biiticue. Cue abido billirui omoï uiñoñena jira, iemo jaca omoï ocuiri.

14

Judíuai illaicomini Jesúna gaitallena, siadua rafue

(Mt 26.1-5; Lc 22.1, 2; Jn 11.45-53)

1 Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana

jaca guiñedimaci. Egiptomona naimaci jaiagai jillobillana comecillena, naie rafue ite. Judíuai illacomini Jesúna jifuiano gaitacadimaci. Naimiena meineiacadimaci. Iena siadua mei, ²raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuitimaci. Nia sedaiticai.

*Jesúmo riño caimare soride ra totaja rafue
(Mt 26.6-13; Jn 12.1-8)*

³ Betania railla nairaímo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llailanona, nainomo ite caimare soride ra naimie ifogímo totade. Naie ra eo raifide. ⁴ Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide. ⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

⁶ Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode. ⁷ Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. ⁸ Cue facaina naiñaiño finoacana diese jai finode. Nia fiodañedicue; ia cue fiodaillirui facaina naiñaiño iese finode. ⁹ Omoimo uanaicinona lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue

(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini dine jaide. ¹¹ Iena cacajano, iobidimaci.

—Iena o finoia, omo ucubena fecaiticai — llotimaci. Iemona Jesúna gaitatalliruimo Judas ocuride.

Jesúdi ie fiodaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaia fajarui illanona, Jesúmo ie llofueoicaigano jicanote:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. ¹⁴ Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ”

¹⁵ Ie mei omicomo afebebamo ite aillue cuartona acataite. Na raruiaí diga ite. Nainomo cai guille fino.

¹⁶ Jesús llua isoi jaidiaimaiaí. Jerusalémo rilla mei, naimie llua isoi baitiaimaiaí. Pascua rafue guille finodiaimaiaí. ¹⁷ Nairui jitoma ana itemo, ie llofueoicaigano diga, Jesús nainomo guisaide.

¹⁸ Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

19 Iena cacajanona, sunaitimaci. Damierie naimiemo jicanoside:

—¿Cuenta ñaitio?

20 Uai ote:

—Omoimona damie bie platomo cue diga llomenico diga mutade. 21 Jusiñamui facaina lloraima micori cueda isoi, monamona jai billamona, fiadaiticue; iadedi cuena gaitaitimie eo duere sefuite. Naimie jeiciñegadena, cuemona mare.

22 Naimaci nia guitimacimo, llomeniconona Jesús llinuanona, Jusiñamuimo iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

23 Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci. 24 Naimie raite:

—Cue fiadaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie.

25 Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue.

*Jesúdi Pedro naimiema januana llua rafue
(Mt 26.30-35; Lc 22.31-34; Jn 13.36-38)*

²⁶ Jobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. ²⁷ Naimacimo llote:

—Cuenta fainonocaitomoi. Jusiñamui facaina lloraima micori iena jaie cuega: “Toica llaudaiai sedaraimana meinetimaci. Naimie toiniaia uaficaida jaitimaci” cuega. Naimie micori caina cuete. ²⁸ Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

²⁹ Pedro uai ote:

—Nana jiaino ona fainonocaia, ona jaca fainonocaiñeiticue.

³⁰ Jesús dinena raite:

—Uanai omo lloiticue. Ja naitava menacaiño nia ñañenia, dacaiño amani cuenta janoitio.

³¹ Pedro dinena riire llote:

—O diga cue fiodaiededi, ona janoñeiticue.

Nana ie llofueoicaigano daje uaido jiaitaitimaci.

*Jesúdi Getsemanímo Jusiñamuimo jia rafue
(Mt 26.36-46; Lc 22.39-46)*

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiaite uite. Naimie sunaicaide. Ie comeci uri ñede. ³⁴ Naimacimo llote:

—Cue comeci sunaicaide. Niadi fiodaiciticue. Benomo fiebi; ia nia iniñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jide:

³⁶ —Ore Moo, nana rana finoredio. Cuenallegi cacaitaño. Cue jitailla isoi cuena finoño; iadedi o jitailla isoi cuena fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia inedemo. ³⁸ Inino. Taife ramo omoina fairaillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dan ocuiñoñede. Ie muidona Jusiñamuimo jii, omoina naimie ocuiñotallena —llote.

³⁹ Ie mei dane jiiellena jaide. Ailli naimie jii isoi, dane jii de. ⁴⁰ Ie llofueoicaigano dine dane billanona, naimaci uisi lliroilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. ⁴¹ Dane jii mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodable facaise jai ite. Jusiñamui jitailla jira, cuena ja gaitajanona, naimiena inoñedino anamo ja iiticue. ⁴² A naidacai. Maiña. Cue gaitataitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofueraimona bitimaci. Naimaci

einamacimona bitimaci. ⁴⁴ Jesús dine naimaci nia riñenia, Judas naimie diga bitinomo jai lloste:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconí naimiena llibanote. ⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote. ⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuená gaitallena, firiraimadicueta cuemo omoi billa. ⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuená jai omoi gaitajamona, Jusiñamui facaina lloraini micoriai cufegafuai suite.

⁵⁰ Ie facaise nana naimie llofueoicaigano naimiena fainonocaillano, aisidimaci.

Jesús jinafona conirue racaja rafue

⁵¹ Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci; ⁵² ia ie iniroina fainonocaillanona, taimiena aiside.

Jesúdi judíuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

⁵³ Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai

illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci. ⁵⁴ Pedro naimaci jinafona aarena racade. Jusiñamui diga nanoca ñairaima nairaibirimo jaide. Jofono sedadino diga nainomo ite iraimo agaide.

⁵⁵ Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. ⁵⁶ Diga comini Jesúna llogidotimaci; ia tainona llotimaci. Daje isoi lloñedimaci. ⁵⁷ Damierie billanona, tainona llogiduanona, raite:

⁵⁸ —Bimie llwana cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiaie finoiticue. Comini iena finoñeitimaci”. ⁵⁹ —Iese llotimaci; ia daje isoi lloñedimaci.

⁶⁰ Naimaci motomo Jusiñamui diga nanoca ñairaima naidadajanona, Jesúmo jicanote:

—¿Ñiese uai oitio? ¿Nie isoide rafue ona llogidotimaci?

⁶¹ Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

⁶² Jesús uai ote:

—Jii, naimiedicue. Monamona jaie cue billanona, imana jaidicue; ia ico jiairuido illaimana cue illena, Jusiñamui ecimo cue raillena, omoi nairai cioitimaci. Mona uillimo cue abido billena jiai cioitimaci.

⁶³ Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitaiñedicaí.

⁶⁴ Jusiñamuina naimie jeare ñaiana jai cacadomoi. ¿Niese naimiena raitomoi?

Jiaie illaicomini dinena:

—Naimie fiódaillesa —lloñimaci.

⁶⁵ Ie facaise damerie naimiena tuallaitimaci. Ie uiecona ibailla mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jai ducoidimaci.

Pedrodí Jesúsna janua rafue

(Mt 26.69-75; Lc 22.56-62; Jn 18.15-18, 25-29)

⁶⁶ Naie facaise Pedro nairaibirimo ite. Naie nanoca ñairaima mullañuañmona dañaiño nainomo billanona, ⁶⁷ Pedro agaillana ciode. Raite:

—Nazaret ie Jesús cominidio.

⁶⁸ Pedro iena januano, raite:

—O llwana uiñoñedicue. Iena raise cacaiñedicue.

Ie mei nase fuedo jaide. Naie facaise itava dacaiño ñaite. ⁶⁹ Naie mullañño naimiena dane cianona, nainomo jamai itinomo llote:

—Bimiedi Jesús ie llofueoicaigano imie.

⁷⁰ Iena Pedro dane janote. Dallu illanona, nainomo jamai itino Pedromo llote:

—Odi Galilea imiedio. Jesús diga jaicabidio.

⁷¹ Uai ote:

—Uanai cue lloñenia, Jusiñamui cuena duere finoite. Uanaicinona cue llwana naimie uiñote. Ero, omoi llogamiena uiñoñedicue.

⁷² Ieconí iitava dane ñaite. Iena cacajano, Pedro Jesús lluana uibiñote. Jaive naio Jesús Pedromo llote: “Iitava menacaiño nia ñaiñenia, dacaiño amaní cuena janoitio”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

¹ Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. ² Pilato naimiemo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode — llotimaci.

⁴ Pilato dinena naimiemo jicanote:

—¿Niese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamiena jamai jino orede. ⁷ Bie facaise cárcelmo Barrabás

raillamie ite. Gobierno diga naimie navui jobair-illa jira, naie facaise comena naimie meinia jira, cárcelmo ite. ⁸ Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. ⁹ Pilato jicanote:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meiniacanana jiai uiñote. ¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. ¹² Iena cacajano, Pilato naimacimo jicanote:

—¿Niese bimiena cue finuana jitaidomoi? Naimiedi omoi judíuai illaima raillamie.

¹³ Ado llotimaci:

—¡Naimiena corai!

¹⁴ Pilato dane jicanote:

—¿Nie isoide marañede rafuena finode? —Iena cacajano, ado ibi llonoidimaci:

—¡Naimiena corai!

¹⁵ Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraillena orede.

¹⁶ Soldaduai naimiena gobernador jofo fo uillanona, nana soldaduai nainomo ofidimaci.

¹⁷ Jiduirede iniroi naimiemo jitadimaci. Eecuaïmona niga nuiciraina naimie ifogimo jitadimaci. ¹⁸ Naimiena jifanoduanona, naimiena uaidotimaci:

—¡Jadi, judíuai illaima!

19 Radosi diga ie ifogimo buta-butadimaci. Naimiena tuallaitimaci. Naimie illaimana itena, naimiena sedallena, caiñici ifodo raiedimaci. 20 Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitadimaci. Ie mei naimiena coraillena oni uitimaci.

Jesúna coraia rafue

(Mt 27.32-44; Lc 23.26-43; Jn 19.17-27)

21 Jerusalémona naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaiaiaidi Alejandro iaiaiaia Rufo diga. Jerusalén onifemona naimie billanona, naimiemo dafaifidimaci. Naimiena Jesús uiga cruzna rocatatimaci. 22 Gólgota raillanomo jaidimaci. Ifocoraina eruailla jira, iese mameciredede. 23 Nainomo rillanona, ie abi isirena cacaiñellena, vinomo erirede rana faianona, Jesúmo fecadimaci; iadedi naimie iena jiroñede. 24 Ie mei naimie cruzmo coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uiñollena, jifanododimaci.

25 Jitoma nia fuiri daidemo, naimiena coraidimaci. 26 Cruzmo ie llogiduaafuena jonetimaci. Jai cueba: “Judíuai comini Illaima”. 27 Ie mei mena firiruide iaiaiaina coraidimaci. Damie Jesús nabeimo coraica. Jiaimie Jesús jarifebeimo coraica. 28 Iemona Jusiñamui facaina lloraima micori jaie cuegafue suide. Cueba: “Maraiñedino isoi naimie jai ite”.

²⁹ Naisodo jamai jaidino Jesúna mameritimaci. Mamerillamona, ifogiana jaididimaci. Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio. ³⁰ Ie muidona dama o abina mai jillota. Cruzmona ana bi.

³¹ Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. ³² Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena inoíticai. —Iese naimiena jifanododimaci. Naimie diga coraicamie iaímaíai naimiena jiai jeare ñaitiaímaíai.

Jesús fiodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitibicaide. ³⁴ Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

³⁵ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraíma Elíana uaidote —raitimaci. ³⁶ Naimacimona damie jarire jaillanona, fibecode ramo vinona faite. Radosimo jilillano jirrollena, naimiemo a fecade. Raite:

—Dallu sedaiticai. Elías naimiena jillotajai billena uiñoiacadicaí.

³⁷ Ie facaise ado cuirioita fiodaite. ³⁸ Naie facaise Jusiñamui jofomo ie fetaca iniroife ana anaba jillacimo metodo menafe cuararide.

³⁹ Jesúna sedallena, nainomo capitán ite. Jesúmo eruaillanona, Jesús fiodaillana ciode. Raite:

—Uanai bimiedi Jusiñamui Jito.

⁴⁰ Dajerie riñoniaí naie rafuena aarena cioidimaci. Naimaci motomo María Magdalena ite. Jiaie María jiaí ite. Naiñaiñodi Jacobo ei. Naimiedi jamamie. Naiñaiñodi jiaí José ei. Salomé jiaí ite.

⁴¹ Galileamo Jesús navui illa facaise naie riñoniaí naimie diga jaisoidimaci. Naimiena canouidimaci. Jerusalémo Jesús billanona, ailluena riñoniaí naimie diga jiaí bitimaci. Ie fiodaillana jiaí cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

⁴² Jitoma ana ítemo, sábado rille jai iaírei illanona, ⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuiride. Ie comecina ocuiñocaida, Pilato dine jaide. Iena raillena, Jesús abina jicade. ⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

⁴⁵ —Jesús jai fiodaite —capitán railla mei, Pilato Jesús abina Josémo fecallena llote. ⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote.

Nofici motomo finoca raiafomo jonete. Nafona ibaillena, aillue nofici nainomo bai ñuitade. ⁴⁷ María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue

(Mt 28.1-10; Lc 24.1-12; Jn 20.1-10)

¹ Sábadoruimo jitoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade. ² Domingo jitiramo jitoma como bairedemo, Jesús raiafo dine naiñaiñuai jaide. ³ Jaillanona, coniañuaimo jicante:

—¿Bu noficina caina oni ñuitalle raiafomona?

⁴ Raiafo dine rillanona, iemo eruaillanona, nofici oni ñuitacana ciode. Naie nofici eo aillue. ⁵ Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jitade. Naimiedi Jusiñamui jaienici. Naiñaiñuai jacinaite. ⁶ Nainomo itimie dinena raite:

—Jacinañeno. Nazaret ie Jesúsna jenodomoí. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda. ⁷ Naimie llofueoicaiganomo iena lluai. Ua Pedromo llono. Galileamo omoi uicomo naimie jaite. Omoiimo naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bummo lloñede.

*Jesús María Magdalenamo bairia rafue
(Jn 20.11-18)*

⁹ Domingo jitaramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede. ¹⁰ Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai cidicue — naimacimo naiñaiño llua mei, iena ñnoñedimaci.

*Mena llofueoicaiganomo Jesús bairia rafue
(Lc 24.13-35)*

¹² Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiaia naisomo macaria, iaimaiaimo bairede.

¹³ Jerusalémo abido iaimaiaia rilla mei, jiaie llofueoicaiganomo iena llotiaimaiaia; ia ñnoñedimaci.

*Jesús ie once llofueoicaiganomo bairia rafue
(Mt 28.16-20; Lc 24.36-49; Jn 20.19-23)*

¹⁴ Ie once llofueoicaigano danomo gutimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote.

¹⁵ Naimacimo llote:

—Nana nairaiaimo jai. Nana cominimo cue mare rafue llocana jai. ¹⁶ Cuenan ñnuamona, bautizagano diese Jusiañamuimona

duere sefuiñeitimaci; iadedi Jusiñamui cuena ñinoñedinona duere finoite. ¹⁷ Cuen a ñinotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. ¹⁸ Jaiona naimaci linoia, naimacina ñiese nibaiñeite. Bainode ra naimaci jiroia, naimacina ñiese nibaiñeite. Duidinona naimaci jetajamona, jilloitimaci.

Jesús monamo jailla rafue

(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. ²⁰ Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cueba rafue jai fuite. Marcodicue.

lxxx

Jusiñamui uai: Jusiñamui jito rafue illa rabenico

New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

145a1f66-dca1-5de3-9c00-4e533605e488